



N 21/1919
23/05/2022

1919-21-2-202205230957



შპს „ჯეო ენტერპრაიზს“

მის: ქ. თბილისი, მარიჯანის ქ., N4, ბინა №2

ელ. ფოსტა: geoenterprise@gmail.com

სსიპ გარემოს ეროვნულმა სააგენტომ განიხილა თქვენი 2022 წლის 16 მარტს გარემოსდაცვითი გადაწყვეტილების მიღების მიზნით წარმოდგენილი N5687 განცხადება, რომელიც ეხება ქ. რუსთავში, მეტალურგიული საწარმოს ექსპლუატაციის გარემოზე ზემოქმედების შეფასების ანგარიშს და გაცნობებთ შემდეგს:

- გზშ-ის ანგარიშის თანახმად, საწარმოო ობიექტი მდებარეობს ქ. რუსთავში, მშვიდობის ქ. N12-ში, შპს „ჯეო ენტერპრაიზს“ საკუთარებაში არსებულ არასასოფლო-სამეურნეო დანიშნულების მიწის ნაკვეთზე, საკადასტრო კოდით 02.07.01.299. მონაცემთა ელექტრონული გადამოწმებით დგინდება, რომ შპს „ჯეო ენტერპრაიზს“ მიერ მოხდა ტერიტორიის გაფართოება და ზემოაღნიშნულმა მიწის ნაკვეთმა 2022 წლის 4 მაისს შეიცვალა საკადასტრო კოდი - 02.07.01.802. შესაბამისად, აღნიშნული საკითხი საჭიროებს კორექტირებას;
- გზშ-ის ანგარიშში მოცემული ინფორმაციით 10 02 02 (გადაუმუშავებული წიდები) ნარჩენები განთავსდება შპს „რუსთავის ფოლადის“ წიდისა და ჯართის გადამამუშავებელ საწარმოს წიდასაყარზე. „ნარჩენების მართვის კოდექსის“ თანახმად, ნარჩენები უნდა გადაეცეს შესაბამისი ნებართვის ან/და რეგისტრაციის მქონე ორგანიზაციას შემდგომი მართვის მიზნით. გაცნობებთ, რომ შპს „რუსთავის ფოლადის“ წიდასაყარზე არ არის გაცემული გარემოსდაცვითი გადაწყვეტილება. ზემოაღნიშნულიდან გამომდინარე, დაზუსტებას საჭიროებს წარმოდგენილი ნარჩენების კანონმდებლობით გათვალისწინებული მოთხოვნების შესაბამისად მართვის საკითხები;
- წარმოდგენილი უნდა იყოს ინფორმაცია წიდების მოსალოდნელი პროცენტული შემადგენლობისა და აღნიშნულის შესაბამისად, მათი გამოყენების მიმართულებების შესახებ;

- გზშ-ის ანგარიშში, ცხრილში 5.5 წარმოდგენილია საწარმოს ექსპლუატაციის ეტაპზე მოსალოდნელი ნარჩენების ჩამონათვალი და მახასიათებლები, სადაც მითითებულია, რომ მოსალოდნელია 18 01 03* (ნარჩენები, რომელთა შეგროვება და განადგურება ექვემდებარება სპეციალურ მოთხოვნებს ინფექციების გავრცელების პრევენციის მიზნით) ნარჩენების წარმოქმნა, რომელთა შეგროვებაც მოხდება სპეციალურ ყუთებში, ხოლო შემდგომი მართვის მიზნით ხელშეკრულების საფუძველზე გადაეცემა შპს „მედიკალ ტექნოლოგს“. გაცნობებთ, რომ საქართველოს მთავრობის 2015 წლის 17 აგვისტოს №426 დადგენილებით დამტკიცებული „სახეობისა და მახასიათებლების მიხედვით ნარჩენების ნუსხის განსაზღვრისა და კლასიფიკაციის შესახებ“ ნარჩენების ნუსხის შესაბამისად, 18 01 03* კოდი ერთიანდება 18 01 კოდით წარმოდგენილ ჯგუფში - ნარჩენები მშობიარობის, დიაგნოსტიკის, მკურნალობისა და დაავადებების პრევენციული ღონისძიებებიდან ადამიანებში. შესაბამისად, დაზუსტებას საჭიროებს კონკრეტულად რა სახის ნარჩენების წარმოქმნაა მოსალოდნელი საწარმოს ექსპლუატაციის ეტაპზე;
- გზშ-ის ანგარიშის მიხედვით, საწარმოში ნედლეულის (ჯართის), მათ შორის კვარცის ქვიშის, ბენტონიტის და ფეროშენადნობის შემოტანა მოხდება სათანადო მომწოდებლებისაგან, ხელშეკრულების საფუძველზე. დაზუსტებას საჭიროებს საწარმოში ნედლეულის შემოტანის საკითხი, მათ შორის დაგეგმილია თუ არა მათი იმპორტი სხვა ქვეყნებიდან;
- გზშ-ის ანგარიშის თავში 4. „პროექტის საჭიროების დასაბუთება“, აღნიშნულია, რომ განხორციელდა ადგილობრივი ბაზრის წინასწარი კვლევა, რის საფუძველზეც მოხდა საქმიანობის დაგეგმვა. თუმცა, დოკუმენტში არ არის მოცემული ინფორმაცია აღნიშნული კვლევის შესახებ (მეთოდოლოგია, განხორციელების პერიოდი, კვლევის შედეგები და სხვა), რაც საჭიროებს დაზუსტებას;
- გზშ-ის დოკუმენტი უნდა მოიცავდეს წარმოებისთვის და მასთან დაკავშირებული ტექნოლოგიების დასაბუთებას, რაც წარმოდგენილია ღუმელის შემთხვევაში, თუმცა გაურკვეველია და დაზუსტებას საჭიროებს, რა კრიტერიუმის მიხედვით შეირჩა საწარმოსთვის რუსული წარმოების ფილტრი და რა უპირატესობით ხასიათდება ის სხვა ალტერნატივებთან შედარებით;
- გზშ-ის ანგარიშში აღნიშნულია, რომ საწარმოში წარმოქმნილი ჩამდინარე წყლები ჩაშვებული იქნება რუსთავის სანიაღვრე წყლების კოლექტორში. წარმოდგენილი უნდა იქნას შესაბამისი ხელშეკრულება;
- გზშ-ის ანგარიშში აღნიშნულია, რომ ტექნიკური წყალმომარაგების მიზნით საწარმოს მოწყობილი აქვს მიწისქვეშა ჰორიზონტის ჭა, რომელზეც ლიცენზიის მისაღებად კომპანიამ მიმართა სსიპ მინერალური რესურსების ეროვნულ სააგენტოს. ხოლო 2022 წლის 3 მაისს, ზემოაღნიშნულ პროექტთან დაკავშირებით გამართულ საჯარო განხილვაზე საკონსულტაციო კომპანიის შპს „სამნის“ წარმომადგენელმა აღნიშნა, რომ კომპანიას უკვე მიღებული აქვს შესაბამისი ლიცენზია. აღნიშნული საკითხი საჭიროებს დაზუსტებას, ხოლო ლიცენზიის არსებობის შემთხვევაში, შესაბამისი დოკუმენტაციის სააგენტოში წარმოდგენას;

- გარდა ამისა, სააგენტოში წარმოდგენილი უნდა იქნეს ნედლეულის ტრანსპორტირების გეგმა-გრაფიკთან დაკავშირებით მუნიციპალიტეტთან კომუნიკაციის ამსახველი ინფორმაცია/დოკუმენტაცია;
- გზმ-ის ანგარიშში, ატმოსფერულ ჰაერზე ზემოქმედების შერბილების ღონისძიებებში აღნიშნულია, რომ „არახელსაყრელი მეტეოროლოგიური პირობების დროს ატმოსფერული ჰაერის დაბინძურებისაგან დაცვის მიზნით, შედგენილი იქნება სათანადო მოქმედებათა გეგმა.“ აღნიშნული ჩანაწერი საჭიროებს დაზუსტებას მოქმედ კანონმდებლობასთან შესაბამისობის კუთხით;
- აირგამწმენდი სისტემის სიმძლავრის დასაბუთების მიზნით, საჭიროა დამატებით წარმოდგენილ იქნეს აირგამწმენდი სისტემის/კვამლგამწოვის დეტალური პასპორტი ქართულ ენაზე.

გარდა ამისა, გარემოზე ზემოქმედების შეფასების ანგარიშთან დაკავშირებით გიგზავნით სამოქალაქო მოძრაობის „გავიგუდეთ“ და ააიპ „მწვანე ალტერნატივას“ მიერ სააგენტოში წარმოდგენილ მოსაზრებებსა და შენიშვნებს.

გთხოვთ, ორი თვის ვადაში უზრუნველყოთ დაზუსტებული/დამატებითი ინფორმაციის სააგენტოში წარმოდგენა. აღნიშნული შენიშვნების გათვალისწინებით დაზუსტებული ინფორმაციის წარმოდგენამდე სააგენტო მოკლებულია შესაძლებლობას იმსჯელოს გარემოსდაცვითი გადაწყვეტილების გაცემის თაობაზე.

დანართი: ტექსტის თანახმად.

თეიმურაზ მთივლიშვილი



სააგენტოს უფროსის დროებით ფუნქციების შემსრულებელი

სსიპ გარემოს ეროვნული სააგენტო

